

1 यहुन्ना

जिन्दगी केर वचन

1 वहि जिन्दगी के वचन के बारे मा जउन आदि ते होत रहैं, जेहिका हम सुनिन, अउर जेहिका अपने आँखिन ते देखन अउर जेहिका हम बहुत निगाह कइके देखेन; अउर हाथन ते झूपन। ²(ई जिन्दगी परगट भइल, अउर हम उहिका देखेन, अउर वहिका बयान देयत हय, अउर तुमका उइ अनन्त जिन्दगानी कय खबर देइत रह, जउन बाप के साथै रहै अउर हमरे ऊपर परगट भइल) ³जउन कछु हम देखेन अउर सुनेन वहिका समाचार तोहिका बतावत हई, यहि खातिर तुमऊ हमरे सभन मा भागीदारी निभावा; अउर हमार इ भागीदारी बाप के साथन, अउर वहिके लरिका यीसु मसीह के साथ मा हय। ⁴अउर ई खबर हम ई खातिर लिखित हई कि हमार आनन्द पूर होइ जाय।

जोति मा चली

⁵जउन खबर हम वहिते सुनें, अउर तोहिका सुनावत हई, ऊ ई आय, कि परमेसुर परकास हंय; अउर वहिमा तनिकउ अन्धकार नाहीं। ⁶ई हम कहीं, कि वहिके साथ हमार सहभागिता हय, अउर वहिके बादिउ मा हम अन्धियारे मा चली, तउ हम झूठा आयं, अउर सत प नाहीं चलत। ⁷ई बात अहैं, जइसन ऊ जोति मा हय, वइसन हमऊ जोति मा चली तउ एक दूसर ते भागीदारी राखत हय, अउर वहिका लरिका यीसु कय लहू हम लोगन के सब पाप ते सुद्ध करत हय।

⁸यदि हम कही, हममा कउनउ पाप नाहीं, तउ जाना अपने आप का धोखा देत हई, अउर हमरे अन्दर सत् नाहीं। ⁹यदि हम अपन पाप का मान लेई, तउ ऊ हमरे पाप का माफ करै मा अउर हमें सब अधरमन ते सुद्ध करय मा विसवासु योग्य अउर धरमी हय। ¹⁰यदि ई कहीं कि हम पाप नाहीं किहेन तउ वहिका झूठा ठहरावत हय, अउर वहिके वचन हमरे अन्दर मा नाई हय।

2 हे हमरे लरिकों, हम ई बात तोहिका यहि खातिर कउनउ पाप करै: तउ बाप के पास हमार एक सहायक हय ऊ हय धारमिक यीसु मसीह। ²अउर उहै हमरे पाप कय परासचित हय: अउर केवल हमरेन नाहीं, वरन सारे संसार कय पापौ।

³यहि हम वहिकी आग्या मानी, तउ वहिते हम जानि जाब कि हम वहिका जानि गये हन। ⁴जउन कउनउ ई कहत हय, कि हम ओका जानि गये हन अउर वहिकी आग्या नाहीं मानत, ऊ झूठा हय, अउर वहिमा सत नाहीं। ⁵पर जे कउनउ वहिके वचन प चले, वहिमा सच्चै परमेसुर के पिरैम सिद्ध हुवा हय: हम क यहि ते जान परत है, कि हम वहिमां हन। ⁶जउन कउनउ ई कहत हय कि हम वहिमां बना रहित हय, वहिका चाही कि आपहूँ वइसेइ चलय जइसन ऊ चलत रहै।

⁷हे पियारो हम तोहिका कउनउ नई आग्या नाहीं लिखित पर वहै पुरान आग्या जउन सुरु मा तुमका मिलल हय: ई पुरान आग्या ऊ वचन हय, जेहिका तुम सुने हव। ⁸फिर हम तुइका नई आग्या लिखित है औ ई तो वहिमां अउर तुममा सच ठहरत है काहे ते अनिहार मिटत जात हय अउर सत कय परकास अबहिन चमकय लागि हय।

⁹जउन कउनऊ ई कहत है, कि हम परकारस मा हन, अउर अपन भाई ते दुस्मनी राखत है, ऊ अबहिन तक अन्धियारे मा हय। ¹⁰जउन कउनउ अपने भाइन ते पिरैम राखत हय, ऊ परकास मा रहत हय, अउर ठोकर नाहीं खाय सकत। ¹¹पर जउन कउनउ अपने भाई ते बैर राखत है ऊ अन्धियारे मा हय अउर अन्धियारे मा चलत हय, अउर नहीं मालुम कहां जाय हय, काहे ते अन्धियारु ते वहिकी आँखन का आंधर कय देहिस हय।

¹²हे लरिकों, हम तुम का एहि खातिर लिखित हय कि वहिके नाम ते तुम्हार पाप माफु हुवे।

¹³हे पितरों, हम तोहिका येहि खातिर लिखत हय, कि

जउन आदि ते हय तुम वहि का जानत हौ: हे जवानव, हम तुमका इसलिए लिखत हय, कि तुमने ऊ दुस्टन जय पाई हय, हे लरिकौ, हम तोहका तुम्हरे लिए एहि खातिर लिखे हन, कि तुम बाप का जानि गयो हव।

¹⁴हे पितरो, हम तुम्हें एहि खातिर लिखेन हन कि जउन आदि ते हय तुम वहिका जानि गये हौ, हे नव जवानउ हम तुमका एहि खातिर लिखे है, कि तुम बलवान हौ, अउर परमेसुर केर बवचन तुमका बना रहत हय, अउर तुमने वाहे दुस्ट पा जय पाई हय।

संसार ते पिरेम नाहीं राख्यौ

¹⁵तुम न तउ ई संसार अउर न संसार म कय कउनउ चीज ते पिरेम राख्यौ: यहि कउनउ संसार ते पिरेम राखत हय, तउ वहिमा बाप कय पिरेम नाहीं हय। ¹⁶काहे ते जउन कछु संसार म हय, अरथात सरीर कय अभिलासा, अउर आँखन कय अभिलासा, औ जिविका का घमंड, ऊ बाप की तरफ ते नाहीं, वरन संसार केर तरफ ते हय। ¹⁷अउर संसार अउर वहिकी अभिलासाएं दूनौ खतम होत जात हय, पर जउन परमेसुर कय इच्छा पर चलत हय, ऊ हमेसा बना रहत हय।

मसीह कय विरोधी केर चेतावनी

¹⁸हे लरिकौ, ई आखिरी समय हय, अउर जइसन तुम सुने हव, कि मसीह कय विरोधी आवै वाला हय वहिके मुताबिक अबहू बहुत मसीह के विरोधी उठे है, इससे हम जातिन है, ई आखिरी समय हय। ¹⁹उइ निकरेन तउ हमरेन मा से, पर हमरे मा कय रहेन नाहीं, काहे ते यदि हमरे मा कय होते, तउ हमरे साथ मा रहतेन, पर निकरि येहि खातिर गयेन कि ई परगट होय कि ऊ सब हमरे मा का नाहीं हय।

²⁰अउर तुम्हार तौ ऊ पवित्तर ते अभिसेक भवा हय, अउर तुम सब कुछ जानत हव। ²¹हम तुमका यहि खातिर नहीं लिखेन, कि तुम सत्य का नाहीं जानत, पर एहि खातिर, कि वहिका जानत हौ, अउर येहि खातिर कउनउ झूठ सत्य की ओर ते नाहीं। ²²झूठा कौन हय? केवल ऊ जउन यीसु के मसीह होवै ते इन्कार करत हय, अउर मसीह कय विरोधी हय जउन बाप का अउर बेटवा का इन्कार करत हय। ²³जउन कउनउ बेटवा का इन्कार करत हय वहिके पास बापौ नाहीं, जउन बेटवा केर मान लेत हय, वहिके पास बापौ हय।

²⁴जउन कुछ तुम सुरु ते सुने हव, उहै तुममा बना रहै, जउन तुमहू सुरु ते सुनेव हव यहि ऊ तुममा बना रहय, तौ तुम भी बेटवा म, अउर बाप म बने रहियो।

²⁵अउर जेहिकी वहु हमते परतिग्या किहिस, ऊ अनन्त जीवन हय।

²⁶हम ई बात तुमका वहिके बारे मा लिखित हइ, जउन तोहिका बहकावत हय। ²⁷अउर तुम्हार ऊ अभिसेक, जउन वहिकी तरफ ते कीन गवा, तुम मा बना रहत हय, अउर तुम का एहि कय परियोजन नाहीं, कि कउनउ तोहे सिखावे, वरन जइसेन ऊ अभिसेक जउन वहिकी तरफ ते कीन गवा तुमका सब बात सिखावत हय, अउर ई सच्चा हय, अउर झूठ नाहीं: अउर जइसेन ऊ तोहका सिखाइस है, वइसेनइ तुम वहिमा बने रहत हौ।

परमेसुर केर बेटवा

²⁸निदान, हे लरिकौ वहिमा बने रहो, कि जब ऊ परगट होय, तउ हमका हियाब होय, अउर हम वहिके आवे पर वहिके सामने सरमिन्दा न होई।

²⁹यहि तुम जानत हौ कि ऊ धारमिक हय, तउ इहौ जानत हौ, कि जउन कउनउ धरम कय काम करत हय, ऊ उहिसे जनमा हय।

3दयखौ, बाप हमते कइसेन पिरेम किए हय, कि हम परमेसुर कय संतान कहलाई, अउर हम हमहूँ उहि का एहि कारन ते संसार हमका नाहीं जानत काहे ते उहिका वहू नाहीं जानिस उहिमा नाहीं जानिस। ²हे पियारो अबहिन हम परमेसुर कय सन्तान हई, अउर अब तलक ई परगट नाहीं भवा कि हमका कछु होवै। इतना जानित है कि जब ऊ परगट होई तब हमहूँ वहिके समान होवै, काहे ते कि वहिका वइसेन देखबै जइसेन ऊ हय। ³अउर जउन कउनउ उइपे ई आसा राखत हय, ऊ अपने आप का वइसेने पवित्तर करत हय, जइसेन ऊ पवित्तर है।

⁴जउन कउनउ पाप करत हय, ऊ बेवस्था कय विरोध करत हय, अउर पाप तौ बेवस्था का विरोध हय।

⁵अउर तुम जानत हौ, कि ऊ एहि खातिर परगट भवा, कि पापन का हरि लइ जाए; अउर वहिके स्वभाव मा पाप नाहीं। ⁶जउन कउनउ वहिमा बना रहत हय, ऊ पाप नाहीं करत: जउन कउनउ पाप करत हय, ऊ न तो वहिका देखिस है, अउर न वहिका जानिस हय।

⁷हे लरिकौ, केहू के बहकावै मा न आयौ, जउन धरम कय काम करत हय वहै वहिकी नाई धरमी हय। ⁸जउन कउनउ पाप करत हय, उइ सैतान की तरफ ते हय, काहे ते सैतान सुरुवै ते पाप करत आवा हय, परमेसुर कय बेटवा यहि खातिर परकट भवा कि सैतान कय कामन का नास करय। ⁹जउन

कउनउ परमेसुर ते जनमा हय ऊ पाप नाही करत, काहे ते वहिके बीज वहिमा बना रहत हय; अउर ऊ पाप करि नाही सकत, काहे ते परमेसुर ते जनमा हय।¹⁰यही ते परमेसुर कय सन्तान, अउर सैतान कय सन्तान जानि जात हय, जउन कउनउ धरम कय काम नाही करत, ऊ परमेसुर ते नाही, अउर न जउन ऊ अपने भाइन ते परेम राखत।

एकु दूसर ते परेम राखो

¹¹काहे ते कि जउन समाचार तुम सुरु ते सुना, ऊ ई हय कि हम एक दूसर ते परेम राखी।¹²अउर कउनउ के समान न बनी, जे ऊ दुस्ट ते रहे, अउर जेहिने अपने भाई के घात किहिस: अउर वहिका केहि कारन घात किहिस? एहि कारन कि वहिके काम गलत रहे, अउर वहिके भाई कय काम धरम कय रह्य।¹³हे भाइयो, यदि संसार तुमसे दुसमनी करत हय तो अचम्भा न करेव।¹⁴हम जानित है, कि हम मौत ते पार हुइ के जीवन मा पहुँच है काहे ते हम भाइयन ते परेम राखित है; जउन परेम नाही राखत, उइ मौत की दसा मा रहत हय।¹⁵जउन कउनउ अपने भाइन ते बाइर राखत हय, ऊ हत्यारा हय, अउर तुम जानत हो, कि कउनउ हत्यारा मा अनन्त जीवन नाही रहत।

¹⁶हम परेम इनही ते जानें, कि उइ हमरे खातिर आपन परान दइ दिहिस, अउर हमहूँ का अपने भाइयन खातिर परान देइ का चाहीं।¹⁷मुला जउन कउनउ के पास संसार कय संपत्ति होय अउर ऊ अपने भाइन का कंगाल देखि के वहि पा तरस न खायेक चाहय, तउ वहिमा परमेसुर कय परेम कइसेन बना रहि सकत हय? ¹⁸हे लरिकौ, हम बवचन अउर जीमिन ते नाही पर काम अउर सांच केर दुआरा भी परेम करी।¹⁹इही ते हम जनबै, कि हम सत्य कय हय अउर जउन बात मा हमार मन हमका दोस देई, वहिके बारे मा हम उहिके सामने अपने—अपने मन मा ढाढ़स देई सकिब।²⁰काहे ते कि परमेसुर हमरे मन ते बड़ा हय, अउर सब कुछ जानत हय।

²¹हे परेमियों यदि हमार मन हमका दोस न देय, तउ हमका परमेसुर के सामने हियाब होत है।²²अउर जउन कछु हम मांगति है, ऊ हमका वहिते मिलि जात है, काहे ते कि हम वहिका आग्या मानित है, अउर जउन वहिका भावत है उहै करित है।²³अउर उइकी आग्या ई है कि हम उकय बेटवा यीसु मसीह के नाम पे विसवासु करी अउर जइसेन ऊ हमका आग्या दिहन है उहिके मुताबिक आपस म परेम राखी।²⁴अउर जउन उहिके आग्या का मान है, ऊ

एहिमां, अउर ई वहिमा बना रहत है; अउर इहि से, मतलब वहि आतमा ते जे ऊ हमका दिहिस है, हम जानित है, कि ऊ हममा बना रहत है।

आतमन कौ जांचो

4हे पियारों, हर एकु आतमा कय परतीति न करौ: मुला आतमन कौ जांचो कि ऊ परमेसुर की ओर ते है की नाही, काहे ते कि बहुत ते झूठे नबी संसार मा निकल परेन है।²परमेसुर कय आतमा तुम यहि तना ते पहिचानु सकत हो, कि जउन कउनउ आतमा मानि लेत है, कि यीसु मसीह सरीर मा होई के आवा है ऊ परमेसुर की तरफ ते है।³अउर जउन कउनउ आतमा यीसु का नाही मानत, ऊ परमेसुर की तरफ ते नाही, अउर उहै मसीह कय विरोधी केर आतमा है, जेहि कय चरचा तुम सुनि चुकेउ हउ, कि ऊ आवै वाला है, अउर अबहूँ जगत मा है।

⁴हे लरिकौ, तुम परमेसुर के हो अउर तुमने उइ पय जय पाई है, काहे ते कि जउन तुममा है, ऊ वहिते जउन संसार मा है, बड़वार हय।⁵वइ संसार कै है यहि कारन उइ संसार की बात बोलत है, अउर संसार उनकइ सुनत है।⁶हम परमेसुर कय हई: जउन परमेसुर का जानत है, ऊ हमार सुनत है, जे परमेसुर को नाई जानत ऊ हमार नाही सुनत, इहि तना हम सत की आतमा अउर भरम की आतमा का पहिचान लेइत है।

परमेसुर केर परेम हमते

⁷हे पियारो, हम आपस मा परेम रक्खै, काहे ते कि परेम परमेसुर ते है, अउर जउन कउनउ परेम करत है, ऊ परमेसुर ते जनमा है, अउर परमेसुर का जानत है।⁸जउन परेम नाही राखत, ऊ परमेसुर का नाही जानत, काहे ते कि परमेसुर परेम है।⁹जउन परेम परमेसुर ने अपने इकलउते बेटवा का संसार मा भेजिस है, कि हम वहिते जीवन पावै।¹⁰परेम यहिमा नाई, कि हम परमेसुर ते परेम केहेन, पर यहिमा है, कि ऊ हमते परेम किहिस, अउर हमरे पापन के छुटकारे के खातिर अपने लरिका का भेजिस।¹¹हे पियारो, जब परमेसुर हमते अइसने परेम किहिस, तउ हमहूँ का भी आपस मा परेम रक्खे का चाहीं।¹²परमेसुर का कबहूँ केहू नाई देखिस, यदि हम आपस मा परेम राखी, तउ परमेसुर हममा बना रहत है, अउर वहिका परेम हममा सिद्ध होइ गवा है।

¹³इहि ते हम जानित है, कि हम वहिमा बने रहित है, अउर ऊ हममा, काहे ते कि ऊ अपनी आतमा ते हमका दिहिस है।¹⁴अउर हमने द्याख लीन है अउर

गवाही देइत है कि बाप ने बेटवा कै संसार कय उद्धारकरता कइ के भेजिस है।¹⁵जउन कउनउ ई मानि लेइत है, कि यीसु परमेसुर कय बेटवा हय, परमेसुर वहिमा बना रहत है, अउर ऊ परमेसुर मा।¹⁶अउर जउन पिरेम परमेसुर हमते राखत है, वहिका हम जानि गये, अउर हम वहिकी परतीती हई, परमेसुर पिरेम है अउर जे पिरेम मा बना रहत है, ऊ परमेसुर मा बना रहत है, अउर परमेसुर वहिमा बना रहत है।¹⁷इहि ये पिरेम हममां सिद्ध भवा, कि हमका नियाव कै दिन हियाब होय, काहे ते कि जइसेन ऊ है, वइसन ही संसारु मा हमहू हय।¹⁸पिरेम मा डर नाही होत, मुला सिद्ध पिरेम भय का दूर कइ देत है, काहे ते कि डर ते तकलीफ होत है, अउर जउन कउनउ डेरात है, ऊ पिरेम मा सिद्ध नाही भवा।

¹⁹हम एहि खातिर पिरेम करित है कि पहिलेउ हमते पिरेम किहिस।²⁰यदि कउनउ कहै, कि हम परमेसुर ते पिरेम राखति है, अउर अपने भाइन ते बैर राखय, तउ ऊ झूठा है: काहे ते कि जे अपने भाइन ते जेहिका ऊ देखिस है, पिरेम नाही राखत, तउ ऊ परमेसुर ते भी जेहिमा नाही देखिस, पिरेम नाही राखि सकत।

²¹अउर उइ ते हमका ई आग्या मिली हय कि जउन कउनउ परमेसुर ते पिरेम राखत है, ऊ अपने भाइन ते भी पिरेम राखय।

परमेसुर के बेटवा पई बिसवासु

5जेहिका ई बिसवासु है कि यीसुइ मसीह है, ऊ परमेसुर ते पैदा भवा है, अउर जउन कउनउ पइदा करइ वाले ते पिरेम राखत है, ऊ वहिते भी पिरेम राखत है, जउन वहिते पैदा भवा है।²जब हम परमेसुर ते पिरेम राखति हैं, अउर वहिकी आग्या का मान है, तउ इही ते हम जानित है, कि परमेसुर केर सन्तानन ते पिरेम राखति है।³अउर परमेसुर कय पिरेम ई है, कि हम वहिकी आग्या का मानी: अउर ऊ के आग्या कठिन नाही।⁴काहे ते कि जउन कछु परमेसुर ते पइदा भवा है, ऊ संसार पै जय पावत है, अउर ऊ जीत जउने ते संसार पै जय मिलत है हमार बिसवासु है।⁵संसार पा जय पावै वाला कउन है? केवल ऊ जेहिका ई बिसवासु है कि यीसु परमेसुर कब बेटवा है।

⁶इहै है ऊ जउन पानी अउर खून ते आवा रहै; अरथात यीसु मसीह ऊ न केवल पानी ते, मुला पानी अउर खून दुइनों ते आवा रहा।⁷अउर जउन गवाही देत है, ऊ आतमा है, काहे ते कि आतमा सांच है।

⁸अउर गवाही देय वाले तीनउ है, आतमा, अउर पानी अउर लहू, अउर तीनों एकइ बात प सहमत है।⁹जब हम मनईन कय गवाही मानि लेइत है, तउ परमेसुर कय गवाही ई है, कि ऊ अपने बेटवा के बारे मा गवाही दिहिस है।¹⁰जउन परमेसुर कय बेटवा पा विसवासु करत है, ऊ खुद ही मा गवाही। राखत है, जउन परमेसुर कय परीतीति नाही किहिस, ऊ वहिका झूठा ठहराइस काहे ते कि ऊ उहिके गवाही पा विसवासु नाही किहिस, जउन परमेसुर अपने बेटवा के बारे मा दिहिन हैं।¹¹अउर ऊ गवाही ई है, कि परमेसुर हमका अनन्त जीवन देहे है, अउर ई जिन्दगानी वहिके बेटवा मा है।¹²जेहिके पास बेटवा है वहिके पास जिन्दगानी है अउर जेहिके पास परमेसुर कय बेटवा नाही, वहिके पास जिन्दगानिउ नाही है।

आखरी वचन

¹³हम तुमका जउन परमेसुर कय बेटवा के नाम प विसवासु करत है, यहि खातिर लिखित है कि तुम जावौ, कि अनन्त जिन्दगानी तोहार है।¹⁴अउर हमका वहिके सामने जउन हियाब होत है, ऊ ई है कि यदि हम वहिकी इच्छा मुताबिक कछु मांगति है, तउ ऊ हमार सुनत है।¹⁵अउर जब हम जातन है, कि जउन कछु हम मांगति है ऊ हमार सुनत है, तो इहौ जानति है, कि जउन कछु हम ओहिते मांगें ऊ पाइ गये।

¹⁶यदि कउनउ अपने भाई का अइसेन पाप करत द्याखै, जेहिके फल न होय, तब बिनती करै, अउर परमेसुर, वहिते, वहिके खातिर जे अइसेन पाप किहिस है जेके फल मउत न होय, जीवन देय, पाप अइसौ होत है जेके फल मउत है, यहिके बारे मा हम बिनती करै का खातिर नाही कहित।¹⁷सब परकार कय अधरम तौ पाप है मुला अइसेनौ पाप है जेहि के फल मउत नाही।

¹⁸हम जानित है कि जउन कउनउ परमेसुर ते पइदा भवा है ऊ पाप नाही करत, पर जउन परमेसुर ते पैदा भवा ऊ ओका बचाए रहत है, अउर ऊ दुस्ट ओका छुड़ नाही पावत।¹⁹हम जातिन है, कि हम परमेसुर ते हई, अउर पूरी दुनियां ऊ दुस्ट के बस मा पड़ा है।²⁰अउर इहौ जानत है कि परमेसुर कय बेटवा आय गवा है अउर उहिने हमका समझ दिहिन है कि हम ऊ सच्चे का पहिचान, अउर हम वहिमा जउन सच है अरथात वहिके बेटवा यीसु मसीह मा रहत है: सच्चा परमेसुर अउर अनन्त जिन्दगानी इहै है।

²¹हे लरिकों, अपने आप का मूरति ते बचाए राखौ।